



Sesida dals

Communitgà ils

Protocol nr.

26 da zercladur 2018

27 da zercladur 2018

515

Incumbensa da fracziun da la PPS

concernent in credit spezial per in'offensiva da digitalisaziun per rinforzar il lieu economic e per promover la digitalisaziun

Resposta da la regenza

Svilups tecnologics han adina influenzà e midà noss mintgadi, e quai vala er per las midadas tecnicas che vegnan designadas cun la noziun generala «digitalisaziun». Singuls commembers da la societad arrivaran mintgamai fitg svelt da trair a niz ils avantatgs dals svilups tecnologics novs, entant che auters han fadia da chattar il contact cun quests novs svilups. Il maun public sto procurar che las consequenzas negativas da las novas tecnologias na donnegeschian betg il singul e la societad e che lur avantatgs possian vegnir sche pussaivel tratgs a niz da tuts. En spezial sa tracti d'infrastructuras adequatas sco er da la scolaziun da la populaziun en l'utilisaziun pussaivla da tecnologias novas. L'offensiva da digitalisaziun pretendida cun l'incumbensa qua avant maun duai sa concentrar oravant tut sin il sector da furmaziun e formular eventualas pretensiuns envers l'infrastructura.

En il text da motivaziun da l'incumbensa vegni renvià a l'offensiva da furmaziun dal chantun Son Gagl. En quella è formuladas directivas strategicas che concernan la preparaziun sin il mund digital en l'instrucziun da la scola populara e dal stgalim secundar II, il basegn da l'economia d'ina furmaziun professiunala fatga sin mesira, la scolaziun, orientada a la dumonda, da forzas spezialas a las scolas autas spezializadas, la scolaziun da caders extraordinaris en il manaschament tecnic sco er en general ina scolaziun che tegna quint da la tecnica e da l'economia.

La «digitalisaziun» influenzescha noss mintgadi en ina dimensiun adina pli gronda. Perquai è vegnidas instradadas er en il Grischun gia differentas mesiras che pertutgan la scolaziun. Cun il cumenzament da l'onn da scola 2018/19 (introducziun dal Plan d'instrucziun 21) cumenza l'instrucziun «medias ed informatica» a la scola populara. Al gimnasi èsi previs d'introducir l'informatica sco rom d'instrucziun obligatoric fin il pli tard al cumenzament da l'onn da scola 2022/23. En quest connex stoi vegnir resguardà ch'il rom complementar «informatica» vegn purschì gia oz al

gimnasi e che medias digitalas vegnan duvradas adina pli savens en l'instrucziun. En quai che concerna la furmaziun professiunala sviluppan las organisaziuns dal mund da lavur (OdML) ensemen cun ils partenaris mintgamai vinavant las professiuns respectivas. Per mintga professiun exista in'ordinaziun da furmaziun sco er in plan da furmaziun. La consideraziun correspondent da la «digitalisaziun» è pia en emprima lingia chaussa da las OdML. En il rom da l'instrucziun a las scolas professiunals spezialisadas vegnan duvrads gia oz medias d'emprender digitalas, meds d'instrucziun digitalas e l'informatica. La scola auta da tecnica ed economia (SATE Cuir) ha introducì da nov il studi «fotonics» e la direcziun d'approfondaziun «digital business management» e porscha ina scolaziun supplementara en ciencias d'infurmaziun. La strategia chantunala da scola auta e da perscrutaziun numna sco sisavel champ da profil «computational science» ed ha dumandà ina professura speziala en cooperaziun cun l'institut svizzer da retschertgas davart allergias ed asma en il sector «data analytics, visualization and simulation». Ultra da quai ha la ibW scola spezialisada superiura da la Svizra sidorientala gia ina vasta purschida da scolaziun e da furmaziun supplementara en il sector informatica. Activitads da las interpresas concernent la scolaziun e la furmaziun supplementara da las collavuraturas e dals collavuratur davart la «digitalisaziun» cumpletteschan la purschida da furmaziun da scola.

Resumond poi vegnir constatà ch'i vegnan realisadas gia oz differentas mesiras en il sector da furmaziun. Quellas correspundan er a parts da l'offensiva da furmaziun planisada en il chantun Son Gagl en il sector da la «digitalisaziun». Stgaffir novas basas legalas n'è betg necessari. Resguardond las purschidas da scolaziun menziunadas qua survart ch'existan en il chantun è la regenza però pronta d'examinar l'integraziun d'in punct central da svilup «digitalisaziun en il sector da la furmaziun» en il program da la regenza 2021–2024.

Sa basond sin questas consideraziuns propona la regenza al cussegl grond da refusar questa incumbensa da fracziun.



En num da la regenza

Il president:

Dr. Mario Cavigelli

Il chancelier:

Daniel Spadin